

TELAU BASUAK

~1~

Meno o adé rajo kayo. Bapak ne kayo nien. Anak ne adé telau. Telau basuak o mañjo nien. Waktau si bi lai, ngan kelak anak ne, tenotoa tiak ne. Sapui lai masiak mañjo.

Sudo o tiak ne matui. Tingēa iñok ne igai. Coa an sudo o, matui kulo iñok ne. Tobo o kayo nien. Erto ne dau. Kareno si biaso mañjo, tobo o coa lak kerjo. Gén baé adé nak penan ne. Upamo ne, umai ne libea, tapi taci ne cuma adé didik. Ijai tobo o jemuoa umai ne. Sudo jemuoa umai, taci aséa ne jemuoa, gacang abis. Tobo o jemua kulo isai umeak ne. Umeak ne dau. Sudo o cigai gén igai penan ne. Umeak ne déwék jenuoa ne. Erto ne bi abis.

Telau basuak yo nano adé ba selai kute. Asuak ne gik paling titik o tun ne peibo. Si galak tema'ak uleak kakak ne. Kakak ne coa lak temotoa nadeak asuak ne. Tobo o uyo cigai adé erto ne igai. Tobo o uyo bi pését, alau mai lem im̄o. Waktau tobo saro nak lem im̄o, ngan gik nem̄in ne adé ba pitat, palau, tebilang. Do o ba ngan gik adé igai, ngan tobo o. Sapui nak lem im̄o, asuak ne miling, “Jibeak uak ige bé adé benatang gik buas. Maro ba ite menea poñog nak piyo baé.” Sudo o tobo o menea poñog ne nak lem im̄o. An tobo o tinḡea nak lem im̄o. Sudo o ke'ing dawen puea, mako atep podog ne mi'is. Nadeak asuak ne, “Cubo ite makui dawen lalang kulo. Dawen lalang o biaso ne ba'es. Waktau ite masiak kayo bele o, anak bueak tiak ite galak menea atep ke'ung sapai ite ngan dawen lalang,” nadeak ne aui o. Jijai tobo o menea poñog ne nano ngan atep ne dawen lalang.

Adé rajo kuñui tebing lak alau beburau mai lem im̄o o. Waktau rajo beburau, keneliak ne adé poñog nak beak im̄o. Adé kulo tetingoa sa'ui tun miling-miling. Waktau si miling-miling, rajo yo mim̄ang. Teningoa ne gén gik nadeak tobo o.

Nadeak do paling tuai ngan asuak ne nano

“Gén kelak nu, 'Suak?

“Lepiak baik kakak madeak kelak nu kileak.”

Nadeak kakak gik tuai o, “Uku lak ijai anak bueak rajo. Gén baé jijai, tukang kesak ijai, tukang tepap ijai kulo,” nadeak ne. “Asal uku em̄uk gik baik, em̄uk monok, em̄uk gén baé, jano baé gik adé.

Sudo o miling kulo gik nomor duai ne. Nadeak ne, "Uku temotoa kelak kakak baé."

"Amen kakak mepuk piring, misal ne, uku nyupau umeak. Amen kakak nyupau umeak, uku mepuk piring. Uku temotoa ngan kenelak kakak." Nadeak gik nomor duai.

Sudo o kakak ne gik tuai nano betanyé ngan asuak ne gik paling titik.

“Gén kelak nu, 'Suak?’”

Asuak ne jemawab, “ Uku lak ijai puan rajo.”

“Ku'ang ajea ko yo! Awak kidek, ipe titik lak ijai puan rajo!” Nadeak kakak ne. Coa si namen asuak ne gik titik o adé ba gik paling ba'es, ngan paling cedik.

Waktau rajo dong mengimang nano, si temingoa nadeak tobo o. Ijai si cigai lak meburau igai. Si semelidik, jano tobo o tun nien, jano tobo o semat.

Sudo o si meletak taño nak keliling poñog o, supayo si coa seset waktau lak teko mulang igai. Sudo o rajo o bélék mai penan ne igai.

Coa an sudo o, rajo teko igai. Si ni'ing pasukan ne. Tun telau basuak nano genepung ne. Sudo genepung ne, rajo em̄in tun telau o mai sadui ne. Waktau em̄in tun telau o, nem̄in ne baik-baik. Betanyé agak baik ngan tun telau o. Waktau o sapui nak umeak rajo. Gik telau basuak o senam̄ut tun sadui o baik-baik, samai aui rajo kulo. Kute tun sadui betanyé: “Rajo lak nikeak ngan gik ipe?” Sudo o rajo madeak, “Uku lak nikeak ngan antara betalau yo, ca'o adat-istiadat te, makui ca'o temotoa caro adat Ejang. Makui ta'ai kejai, aui tun merayo, biaso ne.”

Waktau rajo lak nikeak, tun telau basuak o miling. Nadeak kakak gik tuai, “Oy, akuak ne asuak te ijai nien nikeak ngan rajo yo.”

“Ite temotoa baé,” nadeak asuak ne gik nomor duai nano. “Gén kelak ite bele o? Kakak lak ijai tukang mepuk piring, kan?”

Rajo o sudo temingoa waktau nak poñog yo. Gén igai si lak ngan gik titik, si ba'es kulo. Gik duai nano senayo ne jijai tukang mengesak. Pegén kem̄uk nagiak ne, daging monok, gén baé gik keneliak ne, nagiak ne.



“Oy, rupanya adik kita betul yang jadi nikah dengan raja ini.”

Keduai kakak ne o nano nyebu'au kemeliak asuak ne. Waktau rajo dong alau mai negrai luyen, asuak ne nano melahér. Anak ne gik lahér o adé ba semanui. Kakak ne beduai tamēak nyebu'au kemeliak asuak ne yo. Si gik jijai tukang kusik anak. Si mukus anak asuak ne, sudo o meletak ne nak lem petai, sudo o nonot ne nak bioa Ketawen.

Sudo an anak o monot mai lot, tenemau kei tun tuai gik alau mai bioa, “Gén diyo?” nadeak ne. “ Adé petai sakut nak bioa beuteu o. Mukin do o barang bajau tun gik monot. Mukin adé umeak gik monot?”

Sudo o si mak, nem̄in ne petai o. Sudo sapui nak umeak penan ne tingēa, si mukak petai nano. Waktau si mukak kemeliak ne adé anak titik nak lem o dong tawai, semanui. Sudo o, anak titik o nelui gén.

Gén ne Ujang, kareno tun tuai o coa adé anak, sayang nien ngan Ujang o. Bi lai kulo anak o, si majea ne. Majea ne samai aui majea tun luyen majea anak ne déwék.

Ijai bélék gen cerito ite nano, ngan keduai kakak gik muang anak titik semanui nano. Si gemitui ne ngan anak kuyuk. Anak gik nien nonot ne. Jijai, waktau rajo bélék, keduai selai nano, kakak ne o, madeak ngan rajo, “Oy, Rajo! Asuak kémé melahér, anak ne kuyuk!”

Rajo tecengang. “Maso!” nadeak ne. “Maso selai tun melahér anak kuyuk! Do o coa buliak ite madeak!.”

Nadeak keduai kakak ne, “Kémé coa perneak temingēa asuak. ngan ne ba aui yo, kute ne adé ba kelak tuhan? Asuak ite melahér anak kuyuk.”

Rajo yo jengik nien, atui ne panes. Cuma si coa nam madeak ne, karno si sako kuyuk o anak ne nien. Kareno o ba si meliaro baik-baik kuyuk o.

Dau rakyat ne cemacet. "Rajo o anak ne kuyuk." Tapi rajo coa pedulai. Si akuak coa namen baé.

Sudo coa an ige, waktau puan ne o mengañung igai, aui biaso rajo lalau igai. Dong lalau, rajo coa gén nak umeak waktau puan ne melahér igai. Anak ne semanui igai. Sudo o si melahér anak titik igai, kakak ne beduai o menea aui gik bele o igai. Neletak ne anak titik semanui o nak lem petai, nukus ne baik-baik, kakak ne gik tuai monot igai. Coa an sudo o, rajo bélék. Si beduai o madeak, asuak ne sudo melahér igai. Nadeak ne, anak ne kucing. Rajo betameah jengik baé. "Maso!" nadeak ne. "Sudo duai kilai melahér, pertamo kuyuk, keduai kucing."

Jijai si coa senang kemeliak puan ne. Puan ne madeak, "Diyo coa nam ite madeak. Aui yo ba nasib ite."

Rajo temingoa nadeak puan ne aui o. Kareno o ba si sadar, nadeak ne, "Kalau nasib ite aui yo, ite coa nam madeak." Jijai neliaro ne ba anak kucing o.

Bélék mai cerito ite ngan anak gik nonot nano.waktau tun tuai o, dong lak muang sa'ep mai bioa, kemeliak ne adé petai igai. Petai o lajau nemak ne, sudo o nem̄in ne, si mukak ne. Keneliak ne adé anak titik, papea ne samai ngan anak titik gik dapet ne belo o. Si megén anak titik nomor duai o, Buyung.

Keduai tun tuai o coa gén anak. Jijai senang nein si beduai, sudo o adé anak ne duai-duai.

Keduai tun tuai o majea keduai anak o. An-an lai kulo, sudo o nam kulo paneu, sudo o nam kulo miling. Ati waktau nam miling, si nam kulo miling. Ati waktau si nam paneu, sudo nam paneu.

Bélék mai cerito ite gik telau basuak nano. Puan rajo yo ibo baé, uleak ne mékér baé. ngan nadeak ne, "Anak uku papea ne samai ngan kucing." Mako inok ne sayang nien ngan kucing. Negong ne, senium ne. Menangis si kemeliak kucing ngan kuyuk o.

Sudo o kejijai gik bele o bélék igai. Rajo o alau igai, puan ne dong menganung. Sudo o waktau rajo lalau, melahér igai puan rajo. Anak ne selawui.

Kakak ne gik beduai jengik nien ngan asuak ne kareno si ijai puan rajo. Pas anak ne gik ketelau lahér, selai kulo, si menea aui bele o. Nuang ne igai anak titik selai yo, nonot ne. Jijai waktau rajo bélék, anak gik titik sudo gemitui ngan anak kām̄ing.

Kareno nyebu'au atui ne ngan asuak ne, jijai kakak ne menea aui gik bele o igai. Kelak ne gemitui yo, kareno si lak kulo ngan rajo. Kalau puan rajo o cene'ui ne, mokin dikup kuñui si ijai puan rajo. Nadeak kakak ne beduai o, “Mustai ne ite kileak gik ijai puan rajo, senang ite, coa asuak ite. Nasib ite jijai tukang kesak, sedangkan asuak ite senang nien,” nadeak ne.

Sudo si gemitui anak titik ngan anak kām̄ing nano, bélék rajo. Jijai rajo o mareak, “Coa si bejako!”

Tun nak sadui o terus madeak rajo yo anak ne lahé^r kuyuk, lahé^r kucing, sudo o lahé^r ka^{m̄}ng, coa samai ngan anak tun. Kareno o rajo bepékér, “Gén mene puan ku yo selé nien? Jano puan ku yo coa si tun? Jano si yo benatang?”

Sudo o teko hulu balang rajo. Nadeak hulu balangl, “Si aui yo, rajo. Puan rajo yo coa si tun. Ite mékét ne baé.

Jijai nékét ne puan rajo o, sudo o genatung ne nak pi^{n̄}gia dalen. Kékéa tangen nékét. Api baé gik melitas, semayit selauⁱ o. Tingéa seruwea ngan bajau nak awak. Awak ne senayit, sudo o neletak tun kulo gik pelegiak-pelegiak, ngan cuko. Aui o ba tip bilai si mengamuk.



Sudah jauh anak itu hanyut ke hilir, ditemukan oleh orang tua yang sedang pergi ke sungai.

Bélék mai cerito ite ngan anak selaiu gik nonot nano. Penyudo ne si tenemau tun tuai o igai. Waktau si temau, tun tuai o madeak, “Do o adé petai do igai. Asai ku coa luyen isai ne sahé tun,” nadeak ne. “Do o adé ba penan anak titik, kiro ne. Nak aui adé tun coa senang ngan anak ne igai. Coa ba uku namen, jano si anak apang?” nadeak ne.

Sudo o petai nano nemak ne. Akuak ne isai petai o anak titik selawui, tem̄ui lahé. Anak selaiu o negén ne Upik. Jijai ati waktau ne nam tawai, si bi nam tawai. Ati waktau ne nam paneu, si be nam paneu, samai ngan gik beduai bele o. Ba'es nien anak titik telau o. Papea ne samai baé, cuma dikup selawui.

Ninik ne yo adé ba tun gerot, dau lemau, saktai kulo. Najea ne Ujang ngan Buyung. Najea ne besilé^k, an^gar, meni^mak. Ati anak beduai o najea meni^mak, sebenea ne si sudo nam meni^mak. Sudo o ninik ne majea besilé^k. Ati waktau ne dapet, si bi nam besilé^k. Sudo o kulo belajea maneak, samai baé. Ninik ne meletak ja^mau nak das buluak, si temi^mak ja^mau o, keno. Sudo ne si pacak nien duai basuak o. Gén igai, ninik ne meluk ja^mau mai miⁿas, teni^mak ne, keno igai.

Alangkah cedik ne anak semanui beduai yo. Tai ne cedik makui lemau.

Upik gik adé nak umeak, pakui lemau kulo. Si o ba'es nien. Kemenék kudo kulo pacak.

Adé kerjo ninik ne tip bilai. Kerjo ne burau. Do o ba si majea Ujang ngan Buyung burau. Ca'o ne burau adé ba menīmak. Adé waktau ne debilai, ninik lak alau burau, anak beduai temotoa kulo. Kemeliak ne adé uso. Tenīmak ne, keno matui. Uso o nēmin ne bélek. Kelemo tun nak di, ninik-sebui ngan tun telau basuak o, em̄uk daging uso. Senang nien si.

Adé kerjo sebui nak di, temanem macem-macem bungai ne baris ne nak keliling umeak ne. Si kulo temanem macem-macem pegén lapen. Lu'us ne baik-baik. Kalau tun sapei, bungai o ketén ne ba'es nien. Tenanem ne kulo macem-macem buah-buak.

Bi an-an ninik o sudo tuai. Sudo o ninik ne matui. Tingēa ba sebui ngan anak telau basuak o. Upik betanyé adé coa pesen ninik waktau si lak matui? Sebui ne coa mejawab.

Sudo o Ujang ngan Buyung terus meburau uso ngan kijang. Kalau si burau uso, coa ēmot uso dong tidua, dong tegak tenim̄ak ne.

Buyung madeak, si lak kemeliak kegerot dua besuak o. Asuak ne madeak, “Kakak, gik ipe lak tenim̄ak nu? Jano temim̄ak uso, jano lak kijang?” nadeak ne.

Nadeak Ujang, "Uku lai, uku lak temim̄ak uso."

Nadeak Buyung, “Kalau ko lak temim̄ak uso, tun̄gau ba nak piyo, uku lak kemejar uso kileak, kun̄ui im̄o nak piyo." Sudo o uso melitas melilai de'es nien. Ujang lajau temim̄ak, keno, matui ba uso o.

Sudo o, si lak kemeliak kegerot asuak ne. Nadeak Ujang, "Ko titik, ko temim̄ak kijang baé. Uku kemejar kijang ne." Sudo o si kemejar kijang nano. Melitas ba kijang melilai gik de'es nien. Buyung lajau temim̄ak, keno kulo. Kereno dau ne daging coa tekem̄uk igai.

Jijai kerjo Upik nak umeak adé ba kerjo ngan sebui ne. Gén kerjo sebui ne nano? Kerjo ne men̄ét bajau ngan benang, menea tanḡuk. Si majea kulo ca'o tun temakep kan.

Sudo o waktau Ujang ngan Buyung bélék mai umeak, adé pesen ninik ne senati si matui. Ninik ne teminḡea pesen nano ngan sebui. Pesen ninik ne utuk Ujang ngan Buyung, "Ko jemagai asuak nu yo baik-baik." Do o ba pesen ninik udi. Jibeak sapui asuak nu celako atau sileak. Asuak nu yo masiak titik, tapi kunyau si titik, si lihai.

Pesen ninik bele o, adé kulo ngan sebui, “Kalau Ujang ngan Buyung lak burau, jibeak garang alau mai im̄o nak luea ite yo. Kareno amen si alau mai im̄o luyen, bé dapet celako atau balak. Sudo o, waktau Buyung ngan Ujang alau burau mai im̄o luyen, sebui ne coa si nagiak namen.”

~6~

Waktau alau meburau nak im̄o luyen, temau ba si ngan tun dong mesoa bes. Ijai tun o tekan̄jet, nadeak ne ngan tun beduai nano, “Gen mesoa udi nak lem im̄o yo?”

“Kémé mesoa uso ngan kijang.”

“Oy, nadeak ne, kijang ngan uso dau nien piyo. Sebpak nak sekitar yo dau kulo tun burau. Pues tun temim̄ak ne, coa adé keno.”

Nadeak Buyung, “Alang cedik uso tang piyo!”

“Memang cedik nien,” nadeak tun gik mesoa bes nano. Coa an sudo o si madeak aui yo, melitas ba uso. Tun o temun̄juk. Nadeak ne, "Do o uso melitas! Tim̄ak ba!" Akuak ne uso o temingoa, si bedan.

Nadeak Ujang, “Kalau semayo uku temim̄ak uso o, alau ba kemejar ne kileak. Sayo si melilai! Jijai melilai ba tukang kesoa bes o kemejar. Sudo o uso melitas dong melilai gik de'es nien, lajau temim̄ak, keno, matui ba uso o.

Ujang melui uso gik dapet ne ngan tun mesoa bes o. Ijai tun mesoa bes o coa igai mesoa bes. Kereno riang ne dapet uso o. si bélék, em̄in kulo uso mai sadui ne. Sadui o adé ba penan Ujang ngan Buyung lahér bele o. Si em̄in uso nano, si majak tun sadui bedu'o, ca'o ite tun Ejang. Jenamau tun dau, jenamau ne kulo rajo.

Waktau rajo kemeliak uso o, si tekan̄jet, “Gén diyo?” Nadeak ne, “Kuñui ipe ko dapet uso yo? Kémé baé meburau uso coa dapet,” nadeak rajo.

Nadeak tukang kesoa bes, “Coa si uso o uku dapet idup.”

“Ijai nemak akuak o baé?” nadeak rajo. “Tai ne ko melui tun em̄uk botong uso?” Do o ba rajo muloi mareak ngan tukang kesoa bes o.

“Coa si uku munuak ne,” jawab tukang kesoa bes nano. “Adé tun duai meburau uso. Tun ne titik-titik, tapi ba'es nien. Papea ne samai ngan papea rajo,” nadeak ne.

Sudo o nadeak rajo, “Kalau aui o, tengén tun titik-titik o galak meburau?”

“Asai uku, uyo tip bilai si meburau miñi. Si galak dapet,” jawab tukang kesoa bes o.

Sudo o seniyap ba rajo ngan hulu balang ne lak alau meburau. Hulu balang ne alau kulo. Tobo o aui tun siap ba mai perang atau meburau uso, samai baé. Tukang mesoa bes o temotoa kulo, tukang temun̄juk dalen ne.

Romongan yo alau mai lem im̄o. Sudo o si betemau ngan anak titik beduai o, ngan anak rajo. Tapi rajo coa namen.

“Gén kerjo udi nak piyo?” tanyé rajo.

“Kémé mesoa uso,” nadeak Ujang.

“Kémé lak meburau uso,” nadeak tukang mesoa bes o, “Nak pa'ak yo dau,” nadeak Ujang. “Maro ba ite temim̄ak ne kalau aui o.” Coa an sudo o, ketén ba rajo uso. Rajo nano kemeliak uso o, rajo madeak, “Do o adé uso! Tim̄ak ba!”

Tapi Buyung madeak, “Kalau semayo kémé temim̄ak uso, jibeak uso gik dong tidua. Cubo ba temim̄ak kei rajo.” Rajo o temim̄ak uso o, tapi coa keno.

Sudo o nadeak Buyung nano," Ay, bapak jibeak temotoa kémé meburau kalau aui yo. Keliak ca'o kémé temim̄ak uso," nadeak ne. Coa an sudo adé igai uso melitas. Nadeak rajo, “Do o adé uso! Tim̄ak ba!”

“Amen bapak lak semayo kémé temim̄ak," nadeak Buyung, “alau ba kejar kileak, sayo ba si melilai.”

Alau ba rajo kemejar. Sudo o adé uso melilai kechang nien. Lajau ba Buyung temim̄ak ne, keno, matui uso o. Rajo sapui cengang. Sudo o melitas kacéa gancang nien. Lajau ba Ujang temim̄ak ne kuñui belakang, matui ba kacéa o. Rajo sapui sélég.

Kareno rajo nano sélég, anak bueak ne sapui mareak kulo. Si betanyé, “Udi tun ipe?”
“Kémé tingēa nak lem imō. Dio ba kerjo kémé,” nadeak Ujang.

Nadeak hulu balang nano, “Udi yo omōng nien tingēa nak lem imō. Kémé baé tingēa nak sadui, coa aui udi.”

“Coa si kémé omōng, do o ca'o kémé,” nadeak Ujang.

Pengawal rajo o madeak kulo, "Kalau udi lak betañing nien, maro ba betañing uyo."

“Betañing gén?” nadeak Ujang. “Kalau udi lak majak kémé betañing, maro ba ite temimāk buak lemeu neletak nak ujung buluak,” nadeak Ujang aui o baé.

“Ijai!” nadeak rajo. Rajo coa namen, gik betañing yo adé ba anak kañung ne.

Sudo o Ujang semayo depeak rajo temim̄ak dute. Rajo temim̄ak tapi coa keno. Sudo tenim̄ak rajo, anak buak ne kulo senayo ne temim̄ak kulo. "Cubo udi kulo," nadeak Ujang. Sudo o kulo, kiro-kiro sudo adé telau puluak ijat pemelau gik temim̄ak, tapi coa adé do gik keno.

Sudo o nadeak rajo, "Sapui giliran udi. Tim̄ak ba kei udi," nadeak ne. Ujang o temim̄ak ne, keno pecuak buak léméu o.

Nadeak Ujang, "Udi om̄ong, lak majak kémé betan̄ing. Betan̄ing menim̄ak léméu yo baé, udi coa keno. Jijai kalau lak kemeliak kenam kémé, aui yo," nadeak Ujang. Kemak ba buak lemeu, neluk ne mai mīnas. Buyung temim̄ak, pecuak kulo lemeu o. Si beduai nano bi najea ninik ne kūnui titik. Tenawai ne baé tun gik majak betan̄ing o.

Jijai o panes atui rajo. Si bélék mai sadui ne. Tapi senati si bélék tenanyé ne kileak ngan tun beduai o, "Nak ipe udi tingēa?"

"Kémé tingēa nak lem īmo."

Nadeak rajo, "Do bilai bé kémé alau meto mai lem īmo, penan udi."

"Buliak baé," nadeak Ujang ngan Buyung. Sudo o kute alau. Ujang ngan Buyung bélék mai penan tingēa sebui ne. Rajo bélék mai sadui ne.



Belum anak-anak itu diajarkan menembak sebenarnya, mereka sudah bisa

Waktau Ujang ngan Buyung bélék mai penan sebui ne, akuak ne sebui ne dong bolon. Sebui miling ngan telau basuak o. “Uyo uku yo coa an igai idup. Sebenea ne udi coa anak ku,” nadeak ne.

“Udi betelau yo uku dapet waktau udi monot. Uku madeak gik sebenea ne. Udi yo masiak adé iñok ngan tiak.” Tecengang anak telau basuak o. Si beñok ngan sebui ne. Nadeak sebui ne, “Udi jibeak igai beñok ngan uku.” Nadeak ne, “Udi besebui baé. Tobo o menangis temingoa cerito ne. Tobo o iso anak selaiu tuai o. Si tingēa ngan sebui.

Sebui ne adé pesen. Nadeak sebui, “Ko beduai semanui yo arus jagai asuak selaiu yo baik-baik, jibeak sapui adé celako. Gén baé kelak asuak udi, jibeak coa mak. Jibeak coa magiak!” nadeak ne.

“Au," jemawab Ujang aui o.

“Baik ba, Sebui," nadeak Buyung. Jijai ketelau anak o ibo nien temingoa pesen sebui o. Sebui ne matui, si kenubua pa'ak ngan ninik. Sesudo sebui kenubua, telau basuak o pogo menangis.

~8~

Coa an sudo o, Ujang ngan Buyung alau meburau. Waktau si bélék, Upik madeak, "Uku adé perlu ngan kakak."

“Gén?” nadeak Ujang ngan Buyung. “Uku adé pesen kuñui ninik," nadeak Upik.

“Ninik semayo mak bioa macur kuñui bioa raso. Mak bungai gik nam menyanyi, ngan mesoa burung gik dapet miling. Penan ne nak Tebo Sam gik uak kuñui piyo."

Ujang ngan Buyung miling, "Ijai ba kalau nien ninik madeak aui o."

Si namen gik kelak asuak ne o, pesen ninik ne jibeak coa mak. Lajau si mak kudo ne, letak ne nak adep poñog, sudo o si bepesen ngan Upik. "Ko tingea ba nak poñok yo baik-baik. Jibeak alau. Pem̄uk nu cukup. Kean kémé alau, asuak kemeliak taño-taño keme."

"Amen kémé beraséa mak ne aui gik kelak ninik ngan asuak, mujua ba. Amen coa, ite coa dapet madeak ne," nadeak Ujang aui o.

Nati tobo o alau, si menea taño. Taño gik Ujang, piring neletak ne nak das pagau. Letak ne baik-baik. Nadeak Ujang, "Kalau piring yo pecuak, do o taño ne uku matui." Sudo o Buyung gematung piseu nak das pagau. Nadeak ne, "Amen piseu ku yo bé temetik daleak mai piring kakak, do o taño ne uku kulo matui."

Sudo o alau ba keduai basuak o. Si coa alau mai do ara, kareno dalen o becabang duai. Gik Ujang alau mai ara kideu, gik Buyung alau mai ara kanen.

DewaktaU Ujang alau mai ara kideu, sapui si nak sipang dalen. Nak di si betemau ngan tun tuai. Tun tuai o madeak, “Amen ko lak mai mīni, gén keneliak nu nak dalen, jibeak ko munuak ne, jibeak ko pedulai, terus baé peneu,” pesen tun tuai nano.

“Au, Ninik, men aui o nien,” nadeak Ujang. Coa an sudo o, nak dalen keneliak ne imeu, keneliak ne siamang, keneliak ne uso melitas, keneliak ne keluwang kelai umeak mekik nak pa'ak tiuk ne sapui si pening. Kareno si temingoa nadeak tun tuai nak sipang dalen nano—“Gén gik kemeliak jibeak temim̄ak ... Kalau temim̄ak ko adé celako”—terus baé si paneu.

Alang kedau ne gik murék si nak dalen. Si lak temim̄ak benatang o. Waktau si lak temim̄ak imeu, si bubeak ijai patung, matui. Ujang ijai butau.

Tinḡea Buyung, si terus mesoa. Sudo o si limau nak dalen. Sudo o si mutea bélék ara. An-an si temau igai ngan dalen becabang duai o. Terus si temotoa dalen gik mai kideu. Coa an sudo o, si betemau ngan tun tuai o nano. Tun tuai o tema'ak si, "Gén mene ko nak piyo?"

“Uku coa nam dalen ne. Uyo uku lak temotoa dalen kakak ku nano,” nadeak ne.

Tun tuai o magiak pesen, “Gén baé gik keneliak nu nak im̄o, jibeak murék ne.”

“Au, Ninik,” nadeak ne. Sudo o si terus bekudo. Nak dalen dau mecem gik tenemau ne. Penyudo ne, keneliak ne burung. Burung o mekik, sa'ui ne lék. Buyung lak temim̄ak ne. Buyung ijai butau, aui o kulo kudo ne.

Bélék ite ngan Upik gik tingēa su'ang nak umeak nano. Si kemeliak taño gik Ujang, piring ne pecuak. "Sudo matui kakak ku o."

Nadeak Upik si kemeliak taño Buyung, piseu bedaleak ngan temetik mai piring pecuak o. "Ay!" nadeak ne, "kalau aui yo kakak ku bi matui kute." Upik semiap keracak ne, ngan juadeak neḿin kulo. Si mak kudo. SenAti si alau, Upik alau mai kubua ninik ngan sebui ne. Nadeak Upik aui yo, "Nik, Bui, uku lak alau mesoa kakak-kakak ku. Si beduai sudo matui. Uku arus mesoa mayet ne. Amen masiak idup, ite mujua," nadeak ne. "Amen bi matui ite coa nam madeak ne." Upik temingoa sa'ui kuñui kubua ninik ngan sebui ne, "Alau ba, kémé semayo ko alau."

Lajau Upik alau, si betemau ngan tun tuai nak sipang dalen penan Ujang ngan Buyung betanyé. Padeak tun tuai o, "Lak mai ipe ko sebenea ne, Semulen?"

Nadeak Upik, "Uku lak alau mesoa kakak ku."

"Totoa dalen yo, dalen penan kakak-kakak nu melitas bele o. Tapi adé syarat ne didik," nadeak ne. "gén baé benatang gik gemurék, jibeak ko munuak ne," nadeak ne.

"Jijai," nadeak Upik aui o.

Senati Upik alau, neletak ne kapes nak ti'uk ne, jijai si coa dau temingoa ne. Si terus bekudo. Nak dalen dau gik murék ne, tapi si coa temingoa. Coa an sudo o keneliak kakak ne beduai o.

Waktau si menangis teko ba burung. Burung yo pacak miling.

"Ko lak mai ipe semulen?" tanyé burung.

Upik tecengang. Jenawab ne, "Uku teko mai miyo lak mesoak kakak ku yo."

Burung yo madeak, "Uku sudo namen kute cerito ne. Kakak nu beduai tun gerot nien. Si coa perna miño asal ne. Sipat ne baik," nadeak ne.

"Kemak syarat yo. Kemak nu dawen sergayau ngan bioa. Bioa yo cenapua ngan bioa belas didik, necik ba mai butau o. Do o seyarat ne," nadeak burung o.

Upik mak bioa gik nadeak burung. Necik ne kékéa ngan tangen kakak ne gik jijai butau o. Ujang ngan Buyung idup Igai. Kudo ne gik jijai butau idup igai kulo.

Senati si lak alau, burung o teko igai. Nadeak burung o ngan Upik, "Adé pesen ne?"

Nadeak semulen o, "Adé betoa ne. Kémé mesoa burung gik dapet miling, bungai gik pacak benyanyi, ngan bioa macur kuñui bioa raso."


Nadeak burung o," Kemak baé nak gunung o, coa uak kuñui piyo."

Tun telau besuak o sudo bekuat ngan burung gik nam miling. Tobo o alau mak gik luyen ne. Waktau si em̄in bélék wesiāt ninik ne bele o, bungai gik negong ne menyanyi. Burung gik sudo ngan kuat ne terus miling. ngan bioa macur keni bioa raso o semiram awak ne.

Tobo o bélék mai podog ne. Bioa macur keni bioa raso nano seniram ne nak pinḡia kubua ninik-sebui ne. Bungai gik dapet menyanyi o tenanem ne nak natet gik keno angin. Burung gik dapet miling nano senayo ne lepas. Gén gik nadeak tun si temingoa.

Tobo o senang nien kemeliak gelagat aui o. Bele o, waktau si masiak titik, sebui dau temanem buak-buak. Macem-macem jam̄au, macem manḡus, nak pinḡia umeak ne. Kute pun-pun o sudo bebuak. Manḡus ne uyo sudo mesak.

Kami mencari burung yang dapat berbicara, bunga yang bisa bernyanyi, dan air mancur dari air raksa.



Ujang ngan Buyung alau paneu. Nak lem bepaneu o tobo o sapui nak sadui nak penan rajo tinḡea. Si lak majak rajo burau. Akuak ne rajo lak kulo kemuat ne beburau. Si senang nien najak.

Senati alau, si kemeliak adé selaiu gik nékét. Nadeak Buyung, "Gén mene selaiu o gik terus senayit tun dau?" (Si coa namen, adé ba iñok kañung tun duai basuak o). Selaiu o tecengang kemeliak tun beduai o. Si coa igai meraso gis igai waktau kemeliak tun beduai o, aui si kemeliak anak ne nien. Memang do o anak ne nien, tapi si coa namen. Rajo o coa pedulai ngan selaiu gik nékét o. Rajo temingoa nadeak anak buak ne. Jijai romongan ne terus alau. Selaiu gik nékét nano terus menangis kemeliak keduai tun u'ai o.

Jano kulo, rajo aui coa semangat igai beburau. Nadeak Ujang, "Kalau aui o maro ite paneu-paneu baé mai penan kémé.

Sapui nak poñok, tetingoa kak rajo dau sa'ui tun menyanyi. Adé bungai menyanyi nak penan gik keno angin. Keneliak ne bioa macua miñas. Memang bioa macua ngan bioa raso. Adé burung miling terus.

Nak di kulo tekeliak aui yo, rajo madeak, "Alang keba'es penan yo! Dau bungai-bungai, pengeliak ba'es, buak-buak dau! Rajo yo tecengang. Burung o majak rajo masuk mai lem umeak. SenAti rajo masuk, si semising seruea ne.

"Gén mene semising seruea, rajo?" nadeak Upik. "Do o coa ba bioa, dio ba penan kémé."

Rajo o tecengang kemeliak aui o. Rajo temot samai bepékér, "Penan yo, baik utuk rajo ite. Amen ite tuan penan aui yo, coa sebañing ba'es ne. Tekenal nien penan ite yo.

Anak bueak rajo coa lak masuk mai umeak. Tobo o terus em̄uk buak. Coa an sudo o, rajo yo lak bélék. Si madeak ngan tun telau basuak yo, "Uku permisi lak bélék." Ijai kute ne bélék, rajo ngan hulu balang ne bélék.

Coa an sudo o rajo teko igai lak semerang tobo o. Si lak kemewaso penan tun telau basuak o. Sapui nak di, anak bueak ne coa semanget utuk berperang igai waktau kemeliak alang kedau ne buak-buak o. Hulu balang o terus em̄uk buak-buak o. Cuma burung namen kelak rajo o. "Rajo lak merang ite!" nadeak ne. "Siap-siap ba ite!"

Rajo nano lak masuk umeak, lak temim̄ak telau basuak o. Tapi kemeliak anak bueak ne terus em̄uk buak manḡus o, rajo senang kulo, ijai coa tinget igai kelak ne berperang. Si kemenék pun, sudo o em̄uk ne.

Sudo kenyang, rajo tu'un gacang-gacang. Anak bueak ne lak igai berperang. Sudo o burung miling, "Uku nam kelak udi teko miyo. Udi coa lak baik-baik. Udi lak kidék, lak merang ketelau basuak yo. Cubo baé! Tim̄ak kémé!" nadeak burung.

Kemeliak aui o, atui rajo panas. Tibo-tibo si temim̄ak. Ketelau anak o dong belé'ét nak di. Burung nano betenḡia nak das atep. Rajo terus temim̄ak, tapi coa adé dikup pun gik keno. Telau basuak yo dau lemau ne.

Tenawai ne rajo. “Kalau rajo lak kemewaso penan kémé yo, coa gik sanḡup,” nadeak telau basuak o. Sapui rajo menyereak. Rajo bélék, coa adé penan munyin papea ne.

~10~

Waktau rajo bélék, burung madeak ngan telau basuak o. “Bele o adé pesen ninik, waktau udi masiak titik,” nadeak burung. “Kalau udi lak namen iñok ngan tiak udi gik sebenea ne, diyo bahayo nien. Udi mustai alau mai sadui luyen. Tapi nak di adé tun kidék gik lak munuak udi. Do o ba pesen ninik bele o,” nadeak burung o. “Amen udi lak alau miñi, udi arus kemetén gerot udi kileak,” nadeak burung. Jijai ninik melui udi yo ujian gik paling beneg. Ninik semayo udi utuk mesoa bungai gik nam benyanyi, mesoa bioa macua kuñui bioa raso.”

“Uku adé ba burung gik nam miling. Uku kune senayo ninik utuk temulung udi. Udi arus kuet ngan gerot. Udi harus berasea dapet kute ne. Do o ba gik nadeak ninik ngan uku," nadeak burung ngan telau basuak o.

Adé igai pesen ninik bele o. “Amen si kemerjo kute pesen ninik, ca'o ne udi saling tulung-temulung, ninik semayo uku kemeliak bukau yo ngan udi. Isai bukau yo adé ba cerito asal-usul udi, cerito in̄ok ngan tiak udi.”

“Do o ba!” nadeak burung ngan tun telau basuak. "Baco ba bukau yo, mako udi nam si api udi sebenea ne."

Lem bukau adé penun̄juk mai sadui rajo. Lem bukau tiak tun teleu basuak adé ba rajo.

Ujang, Buyung ngan Upik alau mai sadui rajo. Waktau si bepaneu mai min̄i, si melitas nak dalen penan selau gik nékét. Keneliak ne tun selau o, tinget si. Asai ne adé nak lem bukau ninik nano. Sudo o si betanyé ngan tun nak di.

Nadeak Ujang, "Si api gén selau gik nékét o?"

Tun o jemawab, madeak ngan puan rajo.

Tai ne, gik tegatung o adé ba in̄ok kañung ne.

Sesudo o, Ujang semayo Upik jemagai in̄ok ne. Ujang ngan Buyung alau mai umeak rajo. Si menog, "Tiak!"

Waktau si menog "tiak", rajo tekan̄jet.

"Gén mene udi menog uku tiak?"

Nadeak Ujang, "Aui yo, Rajo. Dio ba bukau tening̃ea ninik kémé. Waktau kémé lahér, gi titik bele o, ninik-sebui meliaro kémé. Si temau kémé telau basuak yo nak bioa Ketawen. Rajo mukak bukau o. Si tinget. "Diyo anak ku," nadeak ne. Tinget lem atui ne, diyo kerjo kakak puan ne.

Rajo megep anak ne beduai o. Anak selai ne ngan puan ne masiak nak dalen. Upik jemagai in̄ok ne baik-baik.

In̄ok ne coa igai meraso sileak ne. Sileak ne bi ka'en waktau si kemeliak anak kañung ne. Si menangis. Waktau si menangis, tiak telau basuak o teko, temetok tilai gik mékét in̄ok tobo o. Nadeak ne, "Mak coa saleak. Diyo adé ba anak ite nien."

Ujang, Buyung ngan Upik temu'un in̄ok ne kuñui penan nak genatung nano.

"Kute ne yo coa si kerjo ku," nadeak in̄ok ne.



**Raja memeluk
anaknya berdua
ini. Anak
perempuan dan
isterinya masih
di jalan.**

“Memang coa," nadeak rajo. “Diyo adé ba uléak kakak nu gik beduai o." Lemo banak o begeh samai menangis.

Menangis kulo kakak puan rajo gik beduai nano. Si menangis sapui pa'eu.

Hulu balang rajo madeak, "Do o adé ba uléak kakak puan rajo. Kémé munuak ne baé." Senati telau basuak sepet miling, "Jibeak munuak," sudo putus kagen tun beduai o. Matui ba kakak puan rajo, bales uléak jahat ne bele o. Hulu balang rajo déwék munuak ne.

Jijai batas yo ba cerito tun telau basuak yo.

Temanem poi, buak ne poi

Temanem lalang, buak ne apai.